





REPUBLIKA E KOSOVËS  
REPUBLIKA KOSOVA - REPUBLIC OF KOSOVA  
KOMISIONI I PAVARUR I MEDIAVE  
NEZAVISNA KOMISIJA ZA MEDIJE  
INDEPENDENT MEDIA COMMISSION



Fiberlink  
Labinot Rudi  
Drejtor  
Gjakovë



VENDIM

**Lidhur me Ankesën nr. 2020/98 Fiberlink (Palë ankuese)  
kundër Klan Kosova**

Faktet

1. Komisioni i Pavarur i Mediave (KPM) ka miratuar Rregulloren për Shpërndarjen e Ofruesve të Shërbimeve Mediale Audio dhe Audiovizuale KPM-2020/01, e cila ka hyrë në fuqi më 3 nëntor 2020. Me këtë Rregullore janë përcaktuar rregullat dhe procedurat për shpërndarjen e ofruesve të shërbimeve mediale nga ana e operatorëve, të cilët pavarësisht teknologjisë së përdorur, shpërndajnë përmbajtje audio dhe audiovizuale.
2. KPM me datën 18 nëntor 2020 ka pranuar Ankesë të parashtruar nga Pala ankuese ndaj OSHMA Klan Kosova, me pretendimin e shkeljes së nenit 10 të Rregullores KPM-2020/01, për shkak të ndërprerjes së sinjalit nga ana e Klan Kosovës.
3. KPM, në lidhje me Ankesën e pranuar me datën 8 dhjetor 2020, i është përgjigjur Palës ankuese në lidhje me obligimet që dalin nga Rregullorja e re KPM-2020/01, duke e njoftuar se sipas nenit 10, paragrafi 1, Pala ankuese është e obliguar që fillimisht të sigurojë marrëveshje të transmetimit nga dhënësit e të drejtave, ndërsa në lidhje me obligimet e OSHMA-ve karshi Rregullores se re do të zhvillohet procedure e veçantë.
4. KPM, me datën 17 dhjetor 2020, përmes një shkresë ka kërkuar sqarim nga Klan Kosova lidhur me llojin e autorizimit që kjo e fundit i ka dhënë operatorit Artmotion.
5. Klan Kosova me datën 28 dhjetor 2020, përmes një përgjigjeje, ka sqaruar se nuk i ka bartuar të drejtën ekskluzive të transmetimit operatorit Artmotion, por të drejtën e distribuimit/përfaqësimit në tërë territorin e Republikës së Kosovës.
6. KPM ka gjetur se OSHMA Klan Kosova (përmes përfaqësuesit të autorizuar Artmotion), me datën 16 nëntor 2020 i ka dërguar ofertë Palës ankuese, e cila ofertë është deponuar në KPM si dëshmi.

## Analiza ligjore

7. KPM, pretendimet ankimore të Palës Ankuese i ka trajtuar në kuptim të nenit 10, paragrafi 1 dhe 2 të Rregullores për Shpërndarjen e Ofruesve të Shërbimeve Mediale Audio dhe Audiovizuale KPM-2020/01.

Neni 10, paragrafi 1, i Rregullores KPM-2020/01, përcakton se:

*“OSHMA-të të cilat nuk e gëzojnë statusin e bartjes së obligueshme, mund të barten nga operatorët e shpërndarjes vetëm në bazë të marrëveshjes valide.”*

8. KPM, ka njoftuar Palën ankuese se OSHMA-të të cilat nuk e gëzojnë statusin e bartjes së obligueshme (ato të cilat janë jashtë brezit-frekuencor radio-difuziv), mund të barten vetëm mbi bazën e një marrëveshjeje valide të arritur me bartësin e të drejtës. KPM është përgjegjëse për të vlerësuar pajtueshmërinë me të drejtën e transmetimit, ku për çdo kanal kërkohet marrëveshje valide nga dhënësi i të drejtave. Në lidhje me ndërprerjen e sinjalit nga ana e Klan Kosovës për Palën ankuese, kjo është çështje e përmbushjes së obligimeve kontraktuale në mes të palëve dhe është jashtë juridiksionit të KPM-së.

Ndërsa neni 10, paragrafi 2, i Rregullores KPM-2020/01, përcakton se:

*“OSHMA-të, pavarësisht formës së transmetimit, duhet të ofrojnë sinjalin në baza jo-diskriminuese dhe jo-ekskluzive ndaj të gjithë operatorëve të shpërndarjes, në mënyrë që publiku të mos përjashtohet nga qasja në informim”*

9. Në lidhje me pretendimin ankimor për shkelje të paragrafit 2 të nenit 10, në bazë të dëshmive të siguruara nga monitorimi i operatorëve të shpërndarjes (Artmotion dhe IPKO) dhe sqarimeve të OSHMA Klan Kosovës, është gjetur se nuk kemi të bëjmë me ekskluzivitet në kuptimin e transmetimit (për faktin se ekskluziviteti nënkupton që vetëm një operator ta këtë të drejtën e transmetimit, ndërsa në këtë rast të drejtat i kanë më shumë se një operator) mirëpo në kuptimin e përfaqësimit në lidhjen e raporteve kontraktuale.
10. Prandaj, KPM, duke u bazuar në faktet e lartpërmendura, gjen se OSHMA Klan Kosova është në pajtueshmëri me nenin 10, paragrafi 1 dhe 2 të Rregullores KPM-2020/01.

## Vendim

11. Refuzohet si e pabazuar Ankesa e Palës ankuese, përmes së cilës pretendohet se OSHMA Klan Kosova ka vepruar në kundërshtim me nenin 10, paragrafi 1 dhe 2 të Rregullores KPM-2020/01.

## E drejta për ankesë

12. Ankesat i parashtrohen Bordit për Ankesa brenda tridhjetë (30) ditësh nga pranimi i vendimit të KPM-së në pajtim me nenin 29, paragrafi 5, të Ligjit të KPM-së. Ankesa bëhet me shkrim dhe duhet të përcillet me dokumente ose dëshmi që mund të kërkohen nga Bordi i Ankesave në pajtim me nenin 42, paragrafi 2, të Ligjit të KPM-së.

13. Bordi për Ankesa do t'i merr parasysh vetëm ankesat e bazuara në informacione ligjërish të relevante të cilat nuk ishin të disponueshme në kohën e marrjes së vendimit të KPM-së, apo të bazuara në mundësi se ekzistonte gabim procedural dhe material i bërë nga ana e KPM-së gjatë marrjes së vendimit.

  
Xhevat LATIFI  
Kryetar



28.01.2021  
Datë